

# КАНОН СВЯТИТЕЛЮ ТИХОНУ, ПАТРИАРХУ МОСКОВСКОМУ И ВСЕЯ РУСИ

*Память празднуем 26 сентября (9 октября)*

## ***Тропарь, глас 1-й***

Апостольских преданий ревнителя и Христовы Церкви пастыря добраго, душу свою за овцы положившаго, жребием Божиим избраннаго Всероссийскаго Патриарха Тихона восхвалим и к нему с верою и упованием возопиим: предстательством святительским ко Господу Церковь Русскую в тишине соблюди, расточенная чада ея во едино стадо собери, отступившия от правыя веры к покаянию обрати, страну нашу от междоусобных брани сохрани и мир Божий людем испроси.

## Канон

### Глас 6-й

#### ***Песнь 1***

*Ирмос:* Яко по суху, пеществовав Израиль по бездне стопами, гонителя фараона видя потопляема, Богу победную песнь поим, вопияше.

**Запев: Святителю отче наш Тихоне, моли Бога о нас.**

Якоже плод красный спасительнаго сеяния Божия явился еси в Церкви, святителю Христов, родителей благочестивых, иерея Иоанна и Анны, быв отрасль предивная.

**Святителю отче наш Тихоне, моли Бога о нас.**

Предречение дивное во сне отцу твоему о грядущем величии твоём, еще ти отроку сущу, по мнозех летех сбыстся, зане воистинну Великим Господином Российския Церкви явился еси, блаженне.

*Слава:* Образ кротости, смирения и любви о Господе являя, добрый помощник юным другом твоим был еси, блаженне, сего ради и тыя, еще ти отроку сущу, архиерея Божия прорекоша тя.

*И ныне:* Спаси нас от всяких бед, Всемилостивая Владычице Богородице, и Твоими молитвами к Сыну Твоему и Богу нашему исцели от греховных болезни страждущия души наша.

#### ***Песнь 3***

*Ирмос:* Несть свят, якоже Ты, Господи Боже мой, вознеси рог верных Твоих, Блаже, и утвердивый нас на камени исповедания Твоего.

**Святителю отче наш Тихоне, моли Бога о нас.**

В вертоградех духовных, православно Богословити и слово Божие иными языки глаголати поучался еси прилежно, блаженне, и сие в церковном служении твоём добрый плод принесе.

**Святителю отче наш Тихоне, моли Бога о нас.**

Егда Владыка Господь объятия отча отверзе ти и яко возлюбленна сына, во иночестве Тихона прият тя, таже и начальника в вертоградех духовных Пскова и Казани поставити тя благоволи, да православныя отроки Богомудрию и христианскому благочестию научиши, блаженне.

*Слава:* Холмскую паству добре управити призва тя Владыка Христос, темже и начало положи святительским подвигом твоим, да в них укрепляясь, изряден архиерей Всероссийския Церкви явишися, блаженне.

*И ныне:* Множества грехов люте обдержат души наша. Ты же, Пречистая Богомати, молитвами Твоими ко Иже от Тебе Рождшемуся пленения сего греховнаго избави и на стезю спасения настави нас.

### ***Седален, глас 1-й***

Доброму евангельскому пастырю подражая, дерзновенно во двор овчий вшел еси, святителю, и своя овцы глашая по имени, во ограде церковней тыя неврединно соблюл еси.

*Слава, и ныне:* К Тебе, о Богомати, молитвенно мы ныне прибегаем и предстательства Твоего пред Сыном Твоим усердно просим от греховнаго ловительства сохрани нас и на путь спасения настави.

### ***Песнь 4***

*Ирмос:* Христос моя сила, Бог и Господь, честная Церковь Боголепно поет, взывающи от смысла чиста, о Господе празднующи.

**Святителю отче наш Тихоне, моли Бога о нас.**

Смотрению Божию следуя, велению матере Церкви повинуюся, земли дальния Американския достигл еси и тамо новую паству – людей алеутских, креольских, кенарских – во ограде Христовы Церкви яко добрый пастырь соблюл еси, Тихоне блаженне.

**Святителю отче наш Тихоне, моли Бога о нас.**

Радуйтесь и веселитесь верныя чада Церкви Российския, иже в Пенсильвании, Калифорнии, Флориде и иных землях Американских сущии, святитель бо Тихон ныне Престолу Божию предстоит и молится о спасении душ наших.

*Слава:* Кронштадтскаго пастыря собеседник быти сподобился еси, блаженне, еще сый епископ града Ярославля, и той ти всероссийское пастырство предуказа. Темже и ныне с ним Престолу Божию предстоя, моли спастися душам нашим.

*И ныне:* Достойно есть прославляти Тя, Владычице, присно спасающую землю Российскую. Се бо и святитель Тихон в Ярославстем

храме Успения Твоего, Государя Николая, яко истиннаго Помазанника Божия сретe и благодарственныя молитвы вкупе с ним о заступлении отечества нашего Тебе и Сыну Твоему принесе.

### **Песнь 5**

*Ирмос:* Божиим светом Твоим, Блаже, утренюющих Ти души любовию озари, молюся, Тя ведети, Слове Божий, истиннаго Бога, от мрака греховнаго взывающа.

**Святителю отче наш Тихоне, моли Бога о нас.**

Егда по грехом нашим нашествие иноплеменных Господь попусти, и земля Российская кровию обагрися, ты, святителю, покаяние проповедуя, и врачевству душевному и телесному страждущих добре содействуя, крепце стояти за веру Православную, царя благовернаго и отечество святое призывал еси.

**Святителю отче наш Тихоне, моли Бога о нас.**

Ополчению вражеску у стен града Вильно стоящу, цельбоносныя мощи святых мученик Антония, Иоанна и Евстафия из обители Святаго Духа благоговейно изнесл еси, святителю, и во граде Москве от поругания иноземных невредимы сохранил еси.

*Слава:* Благоволением Божиим и народа Божия избранием Московским архипастырем поставлен был еси, святе, темже и достойный преемник Московских святителей явился еси.

*И ныне:* Ангельский собор и человеческий род о Тебе радуется, Благодатная Марие, Мати Неискусомужная, Невместимаго бо во чреве вместила еси и родила еси Спаса миру.

### **Песнь 6**

*Ирмос:* Житейское море, воздвигаемое зря напастей бурю, к тихому пристанищу Твоему притек, вопию Ти: возведи от тли живот мой, Многомилостиве.

**Святителю отче наш Тихоне, моли Бога о нас.**

Пустынножитель-старец пред образом Владычицы усердно моляся, жребий со трепетом из ковчезца извлече, на немже имя твое, яко Богом избраннаго Первосвятителя, начертано бе, сего ради и мы ныне, якоже тогда иерархи Собора, немолчно "аксиос" тебе, архипастырю наш, вопием, сотвори и нас яко словесныя овцы достойны быти пажити твоя.

**Святителю отче наш Тихоне, моли Бога о нас.**

О глубины богатства и премудрости Божия! Изволися Духу Святому со иерархи поставити тя, Блаженне, Патриарха Церкви Российския, да во дни испытания веры свидетельствующи крепкое в ней стояние и паству твою неврежденну от наветов вражиих добре соблюдеши.

*Слава:* О неизреченныя любве и милосердия Божия! святитель Тихон во главу Российския Церкви поставляется и мнози людие добраго пастыря обретают, и во ограде церковней соблюдаются.

*И ныне:* Радуются и ликуют людие российстии, Приснодево, Введение Твое во храм празднующе, и возведение святителя Тихона Патриархом Российским в сей же день благодарне воспоминающе, усердно зывают Ти: О Владычице Державная, молитвами святителя Тихона Церковь и землю Российскую от всех наветов вражиих спаси и вся верныя в чертоги небесныя введи.

### **Кондак, глас 2-й**

Тихостию нрава украшен, кротость и милосердие кающимся являяй, во исповедании Православныя веры и любви ко Господу тверд и непреклонен пребыл еси, святителю Христов Тихоне. Молися о нас, да не разлучимся от любви Божия, яже о Христе Иисусе, Господе нашем.

### **Песнь 7**

*Ирмос:* Росодательну убо пещь содела Ангел преподобным отроком, халдеи же опаляющее веление Божие мучителя увеща вопити: благословен еси, Боже отец наших.

**Святителю отче наш Тихоне, моли Бога о нас.**

Плач, стенание и горе великое, грядущия на Церковь Российскую предзрел еси, Первосвятителю, обаче Христовою любовью укрепляем, мужественно зывал еси: благословен еси, Боже отец наших.

**Святителю отче наш Тихоне, моли Бога о нас.**

В лютую годину первосвятительский жезл со страхом и трепетом прияв, блаженне, Церковь Российскую яко корабль нерукотворный добре управил еси, верныя же научил еси зывати: благословен еси, Боже отец наших.

*Слава:* Пророку древнему Илии, зыскующу не преклоньших колена пред Ваалом, подражал еси Первосвятителю, да зыщещи, иже не преклониша выю ловительству безбожных, таже и падших из глубины греховныя воздвигнеши, и верныя научиши в скорбных обстояниях зывати Господу: благословен еси, Боже отец наших.

*И ныне:* Помощницу надежную имамаы Тя, Богородице, многажды бо в скорбных обстояниях предстательство о людех российских пред Сыном Твоим являла еси.

### **Песнь 8**

*Ирмос:* Из пламене преподобным росу источил еси и праведнаго жертву водою попалил еси: вся бо твориши, Христе, токмо еже хотети. Тя перевозносим во вся веки.

**Святителю отче наш Тихоне, моли Бога о нас.**

Во образ твоего усерднаго подражания служению первосвятителей Московских, в священныя одежды тех достойно облачен был еси, блаженне, темже с ними о нас молися, да и мы достойны будем

превозносити Господа во вся веки.

**Святителю отче наш Тихоне, моли Бога о нас.**

Жезл Первосвятителя Петра со дерзновением приял еси, блаженне, да образ власти предстоятеля в Церкви Российской воставиши. Мы же ведяще сицевую милость Божию к нам, Господа превозносим во вся веки.

*Слава:* Грехом нашим умножившимся, попусти Господь братоубийству и междоусобным бранем в земли Российской быти. Ты же святителю, людей враждующих к покаянию и примирению призывал еси, научая превозносити Христа во веки.

*И ныне:* В дому Твоем, Пречистая Дево, храме Успения Твоего, поставление блаженного Тихона в Первосвятителя Российского свершился. Темже молитвы того, яко верного избранника служителя Твоего, к Богу вознеси и спаси души наша.

### **Песнь 9**

*Ирмос:* Бога человеком невозможно видети, на Негоже не смеют чини Ангельстии взирати; Тобою бо Всечистая, явися человеком Слово воплощено, Егоже величающе, с Небесными вои Тя ублажаем.

**Святителю отче наш Тихоне, моли Бога о нас.**

Плачем и рыданием земля Российская огласися, кровь святых мученик и исповедник Христовых потоки по ней излися, храмы Божии осквернишася и попранию предашася. Увы мне, Земле моя! – взывал еси, святителю. Кое врачевание прилежит ти, да всех сих избавишися.

**Святителю отче наш Тихоне, моли Бога о нас.**

Увы мне, людие российстии! – взывал еси, блаженне. Господа забыхом, в делах наших осуетихомся, попечение же о души николиже имехом. Ей, глаголю вам, благоволения Божия не обрящем, аще души наша слезами покаяния пред Господем не потщимся очистити.

**Святителю отче наш Тихоне, моли Бога о нас.**

В темнице томящуся ти, святителю, о Церкви премного болезновал еси, иерарси бо и священницы нецыи на стезю Иуды предателя ступивше и неправедно власть в Церкви восхитивше, злохудожная деяния своя, яко обновления благая нарекоша; и сим паству Российскую в смятение приведоша и в нестроениях церковных тяжце повинни быша.

*Слава:* Ни скорбь, ни теснота, ни гонение, ни глад, ни нагота, ниже беда, ни меч не возмогут разлучити верных чад Христовых от любве Его – апостольски рекл еси, святителю.

*И ныне:* Кия похвалы возгласим Ти, Пречистая. Киими словесы величие Твое восславим, яко Спаса родила еси душ наших.